

海

國

圖

志

海國圖志卷三十五

西阿利未加洲各國目錄

西州內色黎安彌國在河北者九部

一
華
義
羅
尼
國
音
近
字
外

西州內色黎安彌國在河南者十部

西州內上幾內亞國十一部

下幾內亞國二十一部

以下原本
無今補

西州內英吉利佛蘭西大尼荷蘭彌利堅各國兼攝之地在色黎彌安國者四處在幾內亞國者三處

處

海國圖志卷三十五

歐羅巴人原撰

小西洋

西利未
亞洲

侯官林則徐譯

邵陽魏源重輯

西阿利未加洲各國

西阿利未加分兩大區其一區起自色黎雅爾河以南至安彌阿河以北內有九國一嘉約二莽孟三雅爾蘭四夫達多臘五河洼爾六馬臘七孟薩倫八雅尼之稔里大小各國同屬一區佛蘭西人遂合并兩河之名以

名其地曰色黎安彌阿九國之中僅嘉約濱海餘俱腹
內又有西臘氏國相毆遠在色黎雅爾河之北其安彌
阿河以南至敏惟臘河又有十四國同區一霏落司二
夫達雅羅三額林四埃阿里五阿寒氏六那知彌七彌
領八洼里九尼門十根峩十一鑾峩十二雅門十三安
襄臘十四敏維臘皆濱海之區地勢平蕪偶有高阜亦
皆錯出海中名山巨嶽盡在腹內橫數百里袤長約四
千里轉環參錯凡二十四國山以公山爲最巨由色黎
安彌阿至東阿未里加之闊山蜿蜒相連境內河道皆

發源於此山之西有安彌阿河及色黎雅爾河尼額河
山之南有來阿額蘭尼河米蘇那河其源遠而闊者尼
額河由花羅來市直達阿蘭底海安彌河流最駛山色
黎安彌阿南入海色黎雅爾河源較遠曲折深洄由色
黎安彌阿北入海若來阿額蘭尼河彌蘇臘那河俱在
南隅由根峩諸口入海尙有色爾戈河安薩河未悉其
源委其海口距內地里數不等歐羅巴人分疆畫域惟
以河流分界然亦止知瀕海莫窺內地卽阿丹地理所
載亦多臆度始耶穌紀歲千四百三十年明宣德五年西洋

有葡萄亞人舟過麻牙那山麓，棲于阿爾厘島，始訪出北隅之色黎安彌阿，繼尋得南隅之根峩等處，從茲沿海埠頭悉屬葡萄亞。千六百四十餘年，葡萄亞侵袁其俄、戈之地，卽爲荷蘭所奪，雖旋收回，而色黎安彌阿又爲英吉利佛蘭西所據。英人卽在安彌阿河口立埠，佛蘭西則在色黎雅爾河口立埠。兩國皆有公司，各立礮臺，出口貨物惟金及人口最大。至內地情形，英吉利與佛蘭西人講求，探溯尙無端倪。而兩國構兵，遂爲中止。聞其人戶共二千百餘萬口，大都厚唇扁鼻，邪而

後仰色黑髮卷不裝飾無技藝文學戰鬥雖悍平居尙
淳樸不習教門專祀匪底祇之神或以大樹大石或以
象牙狗牙虎牙羊頭魚骨或樹枝繩束等類隨意而指
卽以爲匪底祇之神有供奉在家者有位置在村莊者
立龕列祭遇事祈禱人死多焚財帛謂資冥用宰人作
牲以享先靈嗜音樂喜歌舞多畜妻妾常人多則一二
十王則動百十計而阿寒底那和彌兩國酋長竟至數
千民居卑小門高三尺鞠躬而入一妾一門外圍以墻
上下皆然惟宮室廨署略較爽垲間施采飾以別等級

男女皆喜帶手鐲指環或金或象以多爲美卽赤貧亦繫鐵鐲面繪紅白文身刺膚以手搏飲啖兼數人產橡樟楊柳葡萄酒無花果桂皮甘蔗桑椹薯蒜栗油浮石椰子松柏樹龍血樹檳榔桃柑李蕉菓西瓜黃瓜米粟棉花糖蓆材木金銅錫鐵象牙計象牙歲值銀約十五萬員

色黎安彌阿十國

色黎安彌阿一區內有九國在西阿未里加之北東界蘇厘麻西界海南抵安彌阿河北抵色黎雅爾河東西

距七百餘里南北距二百五十里大小九國又土番三種一曰野羅甫一曰付臘司一曰舅領峩付臘司種類高大鼻扁唇厚面似橄欖俗奉馬哈墨回教性尙平和周濟老弱疾病與外來窮旅游牧爲生隨帳遷徙舅領峩種類面黑業漁喜問訊嗜歌舞多娶妻妾妻有過撻之於市以示懲警野羅付種類面黑業紡織善騎射計數以五作十無文字

嘉約國卽野羅甫在色黎雅爾河口瀕海岸爲色黎安瀉阿區中之大國惟一部落曰麻皆卽酋長所居佛蘭

西人貿易其地遂據河口築礮臺又於對岸之俄黎島
設立部落居人三千爲河口之保障樹木叢茂產豐多
商賈

莽孟國在色黎安彌阿之東附近色黎雅爾河內有那
達更山金鐵相間掘至數尺許卽有金粒至丈許則金
粒成團土番不善支撐礦穴動致坍壓色買臘山金在
剛石之間鑿採費工又有半山出產紅石

雅爾蘭國在色黎雅爾河之上流地處極東與滿母比
鄰佛蘭西船曾商其地獲利倍蓰以水土不服河道難

行恒被劫掠遂不復深入其地

夫達多臘國在色黎雅爾河之下流距海不遠河之南北均其轄地酋長回教種類亦不能制其部下

和洼爾國近海蕞爾之區酋長蠻野無匹自稱曰額利墨臘猶華言王中王云

馬臘國在安彌阿之北距海甚近酋長所居卽馬臘部落也境內有尼利弗里市革設有稅館先屬葡萄亞國英吉利奪之而于安彌阿河口築礮臺防守溯流而上四十里卽比沙部落英人雖有貿易究不與內地尼額

河相通故交易不盛

孟薩倫國在馬臘國之上幅員較闊土番約三十萬均

暑領峩種類

雅尼國稔里國均小國也居于孟薩倫之上厥土墳衍產穀甲一方再行四百里卽沙水并湧之地多鯢魚水鳬岸則野獸成羣舟楫難駛

西臘氏國在色黎雅爾河之北與前九國毗連爲十河源發自公山至馬臘之尼力弗里出口經西臘氏境內者居半

安彌河以南至敏維臘河以北十四國

霏落司國在嘉約之南東界蘇里麻西界海南界夫達雅羅北界嘉約之安彌阿河土厚產豐鷄鴨蜂蜜尤蕃庶歐羅巴人至此貿易向例須曼領畏從中經紀兩家買賣不得見面故不能徑與通商

夫達雅羅國又名富臘司在霏落司之東少南東界額林西南界海北界蘇厘麻幅員約長三百五十里寬三百里一鼎磨一黎彌里阿一西耶臘里阿那一臘達俄司四大部落也酋長居於鼎麻常領千六百人虜掠人

口賣與歐羅巴人爲奴祭祀用人爲牲土番皆付臘司種類俗奉馬賀墨頓教西耶臘厘阿那濱臨海岸爲英商市埠由此至額林邊界約程二百臘彌里阿在彌斯臘那河口爲彌利堅市埠南北長二百五十里寬二三十里土沃民惰多無賴產銀鐵材木皮細布棉花糖油象牙蘇木黃蠟胡椒

額林國在夫達雅羅國東南東界埃阿里南界海西界夫達雅羅北界蘇厘麻惟一部落曰鼎來酋長居之祭祀亦用人爲牲并有夫死而妻自殺墓前以祭者別有

一種教師曰墨爾里能專國中之權其教師少年離俗
露處深林修練日久能作怪異能通奧妙非但識其教
中之理并能審識案牘方可謂之墨爾里其地舊屬葡
萄亞今尙有葡萄亞之人與土番雜處土產胡椒

埃阿里國在額林國之東南界海北界梭難東界阿寒
氏西界額林領部落二一曰臘后濱海口一曰耶格蘇
居腹內臘后所產象牙爲最歐羅巴人以土番獵惡罕
往貿易土番言語聲在喉中若野獸叫噓誠人聞聽

阿寒氏又名俄戈爾在埃阿里之東少南東界那和彌

西界埃阿里南界海北界蘇蘭幅員萬四千里戶百萬口并奴僕之數則有四百萬領部落四一吉戈司一依爾彌那濱臨海邊一阿加臘一準曼里均在腹地吉戈司英吉利商賈所寓有礮臺東行約五十里卽依爾彌那爲荷蘭市埠礮臺甚多海岸土疏多沙而沃產糖與包粟最豐產金礦土番暴躁好訟房屋閑整每村設一會議之所以高年掌之審理訟獄富家多以訟敗產屠人祭墓酣宴數日習俗男逸女勞負重工作無非女惟捕魚則男耳服色尙白酋長以下多繫金鍔兵事或

戰或和悉商之四官春秋二祭皆屠人祈福會長身死
輒戮千人以祭先拘外國奴僕並羈禁之罪囚不足則
虜行人故入市不敢獨行恐被虜也妻妾以多爲貴會
長例有三千並選姿色稍忤意輒戮死並鬻人口與歐
羅巴人爲奴其暴虐甲通洲然酋長亦知慕歐羅巴之
才藝以教其人民陳設器物皆精巧其出口之貨惟有
黃金屬地甚廣如領幾臘阿幾悟洼掃阿廣磨四國皆
其所轄後又征服內地之雅漫陰達那安麻諸國

那和彌國在阿寒氏之東少南東界彌領西界寒阿氏

南界海，北界梭蘭，附近海岸長廣各二百里。其沒海之地曰斯列哥土，華語奴僕岸也。本恢那國之地，其酋長恃富驕淫，遂爲那和彌所併。風俗人情與阿寒氏同，而殘忍更甚。人死不殮不埋，挂于牆壁，任其腐朽。宮室廟宇覆以人之天靈骨，酋長妻妾例有三千。每年傳集番女，挑選一次，上等自留，次者指配番官。鄰近尚有阿那臘那厄里臘俄司諸屬國。臘俄司祈雨，將少婦倒植神前，有犯死罪者，縗首樹杪。阿臘那土產棉花油，番蠟瓦器鐵器。

彌領國又名彌阿佛臘在那和彌之南少東濱海廣約二百里與洼里尼門二國同區彌領地勢低窪恒患潦澇產象牙俗敬匪底祇神國人見酋長當如見神設有干犯酋長者已科犯上本罪再加戮瀆神明規條施以極刑

洼里國在彌領西南濱臨內河地勢卑溼溪汊紛歧皆狹不容舟惟墨臘斯河較闊源流亦長直達阿蘭底海土瘠民稀風俗略同彌領

尼門國在彌領東南沿河逆流而進約行六十里卽耶

付連部落酋長蠻野戰勝卽聚其顱骨以造廟宇以祀匪底祇之神販鬻人口每年約二萬產象牙最多其次油鹽

根峩國在鑾峩之南少東北界鑾峩西界阿蘭底海南抵安臘峩東界曠野領小部落三根我洼在內地酋長所居也馬領麻加敏那均濱海涯土番身體短小面黑有力俗惰罕耕種樹皮爲廬草席蔽體地曠人稀村小者百餘人大者數百人人分四等曰頭目曰錢糧戶曰耕戶曰家奴酋長與頭目多蓄妻妾販人口市埠雖在

海岸而所販之人悉由內地運載而至

鑾峩國在根峩之北西抵阿蘭底海南抵根俄東北俱界牙門風土人情略同根峩

安義臘國在根俄之南東界曠野西界阿蘭底海南界敏雅臘北界根峩風土人情亦同諸部

敏維臘國在根峩之南西界阿南底海東南俱界荒蕪之地北界根峩沿海岸數百里俱葡萄亞所轄每年販人口約二萬計風俗同前諸部產上銅

重輯

原無今補

每月統紀傳利未亞之西濱海有西爾得國其地有兩大沙其一在海中隨水游移不定其一在地隨風飄泊所至積如邱山城郭田畝皆被壓沒國人甚苦之又有工鄂國地亦豐饒頗解義理自與西客往來多奉真教其王又遣子往歐羅巴學習文字講明格物窮理之學焉西得爾國一作西爾得國今屬英吉利夷渠

又曰亞非利加海邊向有匪徒駕船載火器而以美酒玩物賣與黑面奴因此誘販人口又有列國貪利之夷目侵伐鄰境虜掠生俘赴海口販賣將奴三四百口擁

擠下船艙，繩柱檣悶不通風，臭氣染病死者不勝其數。
英吉利公會立法嚴禁巡船到處搜探，一遇載奴之船，
卽捕送治以死罪。上年十月，兵船巡海，遇有販奴舟泊
於海隅，先放礮招降，既不肯投，遂衝鋒掩殺，一人戰死，
六人受傷，竟奪獲其船，赴葡萄亞埠頭，其城之鎮守官
強索其販奴船，英軍不允，葡萄亞放礮擊英之水師，
憤怒返棹，啓咨本國將帥已領戰船赴彼雪怨。

萬國地理全圖集曰：西亞非利加之海北係沙地，其黃
道南北兩地深林密晝，瘴氣彌空，外人不服水土，多患

病居民黑面卷髮扁鼻厚唇愚鈍無知或崇回教其土人不服一君亦不立國家但各自爲族袤延方圓三百六十萬方里約計二千萬丁顏色悅和揚眉暢氣並不慮遠會時鮮衣裘舞男女用金珠象牙渾身華飾貧人大半裸體無羞其僧誘惑庶民殺人祭神將各項樹木禽獸爲神而拜之或用妖術靈符殊可痛恨其居室櫛巢草寮不用金銀惟以貨易物土肥饒產不待人力故民皆游惰每臨餓乏則族攻族類擊類而相呑所獲之俘則賣爲奴外國船到此以買其人口將二三百人雜

裝船內駛到各國販賣以種園耕地如此黑族蔓延四海無處不至故此英國發義怒嚴禁販賣又排巡船恒駛海濱往來捕治○葡萄亞國初據此地爲荷蘭所奪後佛英兩國開海濱新地建礮臺但恐山林瘴氣不敢入內地西北海邊葡國所據之島曰馬太拉島初時遍地深林焚烈種植作葡萄酒賣與外國每年價銀三十萬兩○加拿大羣島有山嶺其最高者百二十丈名特尼勒山爲船之標準此嶼歸是班牙國亦出葡萄酒不少○綠山頭羣島不毛之地瘦嶺枯山其海濱出鹽○

羣島對面之海邊沙漠其南方西尼甲江有佛蘭西礦臺與居民貿易布疋金沙樹膠每年來船三十隻貨價銀六七十萬兩民人大半回回中有數族安分務商感北亞河南流入海有英國商埠包兌包送之地此江之南開英國新地稱爲獅山產象牙油蠟皮木頭樹膠價值銀四十二萬兩英人如獲奴船在此釋放又召教師開學以傳耶穌之道雖頑蠻難化虛費不貲然援人于水火之禍不獨保其生命乃引之履天道其東南邊稱曰危尼中有花旗國新地○更望南而往其海濱一

曰穀邊、一曰象邊，皆蠻民猛力好戰，攻接外船，性近禽獸。一曰金邊，乃英荷所建礮臺，與土人通商之處。其百姓稍已入化，又立長老治之。金邊之東有大黑國，稱爲亞山地，其國王起兵與英交鋒，又與鄰小國結盟，今亦服之。國王娶妻三千，更赴南販賣人口，再至南則到比納海邊，居民懷服其王，受死無怨，惟命是聽。另有破島，其埠頭歸是班牙國，其最南方稱曰公我，被葡萄亞所占據，專販人口，所建之城頗大，商頗盛。

地里備考曰：塞內岡比國，在亞非里加州之西北極出

地十度起至十八度止經線自西九度起至二十度止東至尼給里西國西枕亞德蘭的海南接幾內亞國北界沙漠長約二千七百五十里寬約二千里地面積方五十五萬烟戶一京二兆餘口平原沙漠相間少山多林河則塞地加爾河爲首岡比河那祿河次之故統名曰塞內岡比國沃土豐產穀果藥材金銅鹽琥珀紋石象牙皆具炎瘴特甚惟五月至八月陰雨暑氣稍降土人色黑髮卷列酋分攝或世襲或選立各霸一方所奉回教國以河得名故通國分二十小國在河南北曰弗

達多羅曰弗達日羅曰弗拉都曰加孫曰賓都曰牙尼
曰弗義尼曰烏黎曰登的里亞曰分達曰加科爾達曰
邦布各曰薩隆曰加布曰日的羅弗曰新曰烏阿羅曰
巴爾曰加約爾曰薩倫

西州各國補輯此數國四洲志無之今據他書補

又地里備考曰幾內亞國其上幾內亞在亞非里加州
之西南南極出地一度起至北十一度止東至沙漠西
南接亞德蘭的海北界塞內岡比國及尼給里西國長
約八千五百里寬約三千里地面積方一百零五萬里

烟戶一京餘口民人多黑齒莽無文本國公山爲尼給里西及塞內岡比二國分界海濱低陷烟瘴觸人河長者名曰尼日爾由尼給里西貫徹本國而注於亞德蘭的海其次曰塞勒郭安薩田土肥饒穀果豐稔土產黃金珊瑚琥珀紋石甘蔗烟葉香料地氣炎熱夏秋則陰雨連縣列酋分攝各據一方所奉之教或拜山河或奉禽獸初無一定技藝缺乏耕種皆女通國分爲數十小國其要者曰的馬尼曰古郎哥曰蘇尼馬那曰加布蒙德曰桑固音曰加瓦利曰亞於的亞曰達可美曰亞爾

達拉曰巴達給里曰拉各斯餘未及載

公額國又名下幾內亞在亞非里加州之西南南極出地一度起至十七度止經線自東八度起至十八度止東至日牙加地西接亞德蘭的海南連星卑巴西亞國北界上幾內亞國長約三千八百里寬約一千四百里地面積方四十四萬里烟戶四兆餘口地勢東方多山眾河發源於此其長者曰公額又名塞勒四面繞貢田土最腴產銅鐵甘蔗胡椒烟葉薯粉象牙等地氣燭烈技藝缺乏貿易稀疎列酋分攝不屬別國管轄者分二

十一小國、一羅昂額、一公額、一賓巴、一薩拉、一莫盧阿
斯、一虎美、一加三日、一岡各白拉、一何國、一何羅合、一
日仍加、一幾蘇阿、一古達多、一古寧加、一當巴、一里波
羅、一幾薩馬、一塞拉、一白倫多、一難諾、一比黑。

其屬列國者曰星卑巴西國，在亞非里加州之南，南極
出地十八度起，至二十五度止，經線自東十度起，莫知
所至，西接亞德蘭的海南連科丁多的亞國，北界公額
國，長約二千七百五十里，地面積方，約三十四萬里，烟
戶約二億餘口，海濱艱險，平原磽薄，一望沙漠，人民蕭

條猛獸充斥國多無籍遊民

本州西南臨海幾內亞之地凡荷蘭大尼花旗各國市
埠皆在其中隸賀蘭國兼攝者名厄爾彌那城建於幾
內亞國中烟戶約一萬口景色壯觀商賈接踵設有總
理駐札其地餘城皆受節制○隸大尼國兼攝者曰給
里斯的巴爾其城在幾內亞國中地產饒豐工良商眾
設有總理駐劄其地條城彈丸皆受節制○隸亞美里
加州花旗國兼攝者在幾內亞國門蘇拉多河濱曰里
卑利亞其居民皆由亞美里加州遷徙首郡名蒙拉維

學館書庫備具商賈輜輶


外國史略曰西亞非利加海邊地通各國商埠者一曰西尼安在曠野之南廣袤方圓約三萬里多暑盛烟瘴民皆黑面各有酋長風俗殊異好戰鬪地或沙或壤物產不由人力佛蘭西在此海邊開埠築炮臺在路義義利等島建邑土酋多畏其勢產穀椰子棉花棗黛青烟胡椒等貨英人及葡萄亞等國亦開埠然甚微小○獅山在海濱長五十五里闊六十里卑溼多澗澤內地漸高惟歐羅巴人所居地多產物其黑面人地極荒蕪土

民稠密飲水食樹根不肯工作乾隆四十七年英人在此開埠方圓約十七里嚴禁販賣人口常調師船巡駛所獲之奴即送獅山設教師開學館以施慈政居民約三萬二千後小邑鄉里務藝術英國每年費銀九十萬兩以立此港道光十六年運入之貨二十八萬七千兩運出者二十八萬五千兩民寡而勤故地雖褊小能通商

一危尼地在西海濱其通商各異埠一曰穀油濱自山內及米蘇拉加地一曰象牙濱自巴馬及亞破羅尼地

一曰金濱自亞破羅尼及窩他河一曰奴濱在窩他河東邊最要者曰亞山地曰他何米曰押他曰巴他義曰拉峩等國亞山地族類權勢甚重百姓百萬織布鍛五金勇敢殘酷其君妃嬪四千淫邪無度死之日殺千餘人以殉可馬西族類亦在各海濱通商英吉利荷蘭大尼等國各建礮臺調守兵以護貿易屬地褊少居民亦罕運出貨價僅數萬金此州內地甚廣部落多民俗異外國人未有入之者故不識其形勢北方有地曰丁布士大市也北賈雲集駝馬不絕又布奴近大湖亦通商

又副拉居民稠密土酋豪健常領兵以據其鄰國



海國圖志卷三十六

中阿利未加州各國目錄

中州尼吉里西國一名蘇丹二十二部

莫盧農

曼那臘

羅良

雅彌

蕪名地

萬司

沙加都

峩墨山付臘

嘉諾

嘉司那

色塞

嘉達

嵩司沙西

裕里

洼瓦

莫爾教

莫司沙

巖阿

泥筆

以上十九部皆與西洋通市之地又附
泥筆泥霏五小部曰沙達盧至富臘盧不錄

丁麻杜

麻西那

展里

莽馬臘

加阿臘

嘉孫以上六部五小部皆尼厄河上游之國未與西洋通市

海國圖志卷三十六

歐羅巴人原撰

小西洋

中利未
亞洲

侯官林則徐譯

邵陽魏源重輯

中阿利未加洲各國

職方外紀言亞昆心域國地
極大居本洲三分之一則中

阿利未加亦在其內
不止阿邁司尼也

中阿利未加洲地處中央環以羣山沃野平曠灌溉不竭爲全洲膏腴之最西界西阿未里加北界曠野東界查湖南界無考長三千餘里廣千有餘里山最大者曰

閼山自東至西起伏綿亘與洲境同其起迄中阿未利
加僅山之中央一隅耳峯巒層疊崖石嵯峨有似倒塌
炮臺者有似銳浮圖者形勢不一高者二千丈崎嶇
與平坦相間山內可種棉粟并有城垣依山而建天炎
土燥而田疇不乏水澤皆資閼山之灌溉河道有四曰
尼阨河曰孤盧尼河曰菰彌河曰瓜臘馬河皆發源閼
山而尼阨河最鉅源遠流長計三千餘里總受諸河之
水由機里出海諸國皆沿河建立湖以查湖爲敢闢與
磨爾農連界長約六百里寬約四百里其水澄清甲天

下湖中小島各有居人林深草茂飛走藪澤次爲尼彌
湖雖不及查湖之大亦一目難窮此外皆小湖而已幅
員遼闊內多小國距海岸遠不與海國通往來近四十
年始有冒險至其地略悉情形究無史書難溯源委讀
阿丹地理誌載千二百年宋承安五年部內之人遷徙曠野
之南可見居於中阿未里加洲者多阿丹之人并聞先
日有阿麻西尼司與翁彌阿尼司互爭勝者各自立國
其最大者嘉諾曰薩加曰磨爾農嘉諾之南產金最旺
于四百年明建文四年摩羅果大頭目阿佛厘加盧士統眾

至丁麻杜奪得依機阿各地立國稱王卽名丁麻杜國嘉時嘉諾亦屬丁麻杜所轄矣千七百年

康熙二十九年間又

歸於加斯那干八百初年

嘉慶五年薩加覩頭目曰蘭華利

荷者自立爲王并服嵩司沙部磨爾農部遂成大國不久分裂爲摩爾農頭目所驅逐嵩司沙各部落若俄墨若色塞同時亦各自王卽如丁麻杜國自阿佛厘加盧士以後卽爲摩羅果之屬國滿馬臘向稱大國所屬之展里大部落近已爲頭目阿馬盧所據各國政事皆自專制故無著名之邦亦無統轄之主蝸角蠻觸各長一

方其俗百官見王匍伏殿前以首叩地名國王死屠人
以祭雖不若西阿未里加阿寒氏那和彌二國之多然
祀典用人亦不能歛王之所貴不在宮室制度而在妻
妾貨財故國王宮室僅加於民居一等往往苦盡塵穢
乳燕環飛兒童裸露樸陋無倫而妻妾之多則難以數
計凡監守各官以至服役皆姬妾焉部落長官皆由民
自推擇賦稅無定額軍旅無紀律惟摩爾農之兵似有
隊伍善長鎗鏃牌行列方圓成陣臨戰僅裹獸皮以禦
弓矢薩斯覩國有兵六萬各國皆不習火銃惟阿丹答

商有火器遇兩國爭鬪常以此解圍土產粟米棉花洋
龍六畜獅象豹蜂蜜象牙金沙洋藍布各埠運貨并無
車輛全藉負載賈於斯者皆阿丹之人由北阿未里加
越歷沙漠缺水草多盜賊近日始知僱駱駝駄載節省
倍徒所運入者如絲紬呢紙珠銀器利皆數倍迎出則
黃金象牙奴僕居多奴僕多自南山虜掠而來非但賊
盜即國王貴官亦然如莫爾農之王與曼那臘王之女
爲婚會會赴麻斯俄虜掠人口三千以賀嘉禮境無溝
洫亦少衢道荒陬曠野信足穿越或倒木橫阻或兩水

泛濫行旅躋躅馬瘞僕吁土番與阿丹之人雜處僅學其技藝工作從不習其回教文字地素蠻野較之通洲則尙知禮義喜結交惟俗尙掠奪在他方尙以貧劫富此則以富劫貧習不爲恥凡事皆信匪底祇之神其摩爾農蒿司沙兩國極欲修文苦無教導性喜歌舞雖尊貴亦登場演唱揚揚自得土番面皆黑卽所謂烏鬼國云

莫爾農爲中阿未里加洲强大之國幅員七萬五千五
方里戶二百萬口在查湖之西濱湖水鄉美稼穡多獅

象熊虎爲害領大部落八鈞加其首部落也其次若安俄那若安牙臘若吾尼若加領若臘里若加沙里若阿爾磨盧農七部湖山錯壤大小名別而富庶以安俄那爲最始王其地者本阿丹之人嗣有依爾加尼者起兵據國放前王子附郭逐官民回阿丹其國中大官以蟠腹爲美首纏白布其王接見歐羅巴人則端坐龕中外列侍從陳兵護衛性好鬪而不輕捷敗則走步艱難坐以待斃土番黑面厚唇樸魯好鬪善紡織精染洋藍耕種皆以女國王所駐鉤加部落甚小居民萬人安俄

爲國中最大之部居民三萬貿易集會約有十萬安牙
臘吾尼亦兩大部北則加領部與曠野交界居民驍勇
臘里部民僅二千加沙力亦大部居民善用藥箭阿爾
磨盧農部落近已荒廢

曼那臘國在磨盧農之南山谷土沃領大部落八以磨
臘爲首區悶山最高之峯在其境內陟巔遠眺疆域了
然土番不習教門文身衣革麻斯俄部落最爲蠻野好
騎生馬衣山羊豹皮取鬚人牙齒串珠掛頸以夸其羣
那古爾臘地處山谷村堡堅固好武關勝善用藥矢摩

爾農兵侵之爲所敗

羅艮國在查湖之南爲洲中最靈巧之國接壤強鄰皆究惡好殺竟能立國保境安民皆才智所致也卽以羅艮爲首部落街衢坦闊距查湖僅四十里產佳木香草精染洋藍布不亞於摩爾農錢用鐵鑄形如馬蹄番婦容貌在黑人中爲最端好卑溼多蚊惟日午暫息餘時皆蟲飛薨薨

敏雅彌國在查湖之東南土域遼闊土番勇戰衣鐵甲習長鎗摩爾農器械尤備交鋒亦無紀律

無名地在查湖之中島嶼甚多居於斯者皆彌落麻之人島旁泊船千計無非盜艇土謠云天未賜我糧神未覲我牛與羊只生贍力與詐腸我居宛在水中央不刦何以豪四方磨爾農王欲禁之無如何也然所虜人口以作奴僕尙不甚殘虐往往給以妻室

葛司沙在尼阨河之西幅員遼闊界域莫詳壤燥宜麥一歲再獲倉廩充實果蔬既多且旨土番皆阿丹之人自耶穌千年以後失咸平三年陸續遷至非其回教中人無不被虜爲奴與西隅之黑番貿易

沙加都國卽多谷魯在蒿司沙之西土沃民庶先居薩加都近遷馬雅利阿城池壯闢甲於中洲墻高三丈門戶十二日落卽閉王宮前面方角開敞四壁藻繪薩加都之舊部落近已頽毀

俄墨國山付臘國均蠻地好鬪俄墨首部曰古尼阿城池堅固於千八百二十九年道光二年蒿司沙率兵六萬侵之爲俄墨所敗山付臘首部曰沙彌當嘉諾薩加都兩部之衝專刦行旅爲業

雅那國卽嘉諾爲阿未里加腹內之地疆域雖狹於舊

而商賈市半猶甲諸國嘉諾首部落也周有十五里居
民約三四萬中央地窪而曠水涸之後貿易聚焉爲一
大市鎮有頭目司市價辨真僞設有賤售貴賈亂真者
則經紀受罰日出登市日入卽散又有奴僕市兩棚分
列男女各坐一棚買者先觀五官四肢繼令其步履聽
其音語市用小介壳爲錢謂之勾力士四百八十枚值
銀一錢八分

嘉司那國在嘉諾之北向稱大國前時之葛司沙曾屬
其管轄城墉廣闊民居不及十之一皆商賈所集

色塞國在嘉諾薩加都二國之南爲中洲最沃之壤產
上米蜜棗沙厘阿其首部也居民五萬田疇繡錯林麓
葱蔚色塞之南亦饒水草尙有小部落屬其統轄

加達國居眾山之中村莊大小五百領羅臘其首部也
地雖多山而濱涉力河土亦膏澤貿易頗盛惟土番蠻
惡前遇歲歉盡屠外國商賈而食之由領羅臘沿河而
東卽阿那磨洼皆加達屬地也

蒿司沙之西國轄部落四首卽加雅東部次卽山尼阿
部次加達艮部次珊瑚山部加雅東美田疇山尼阿在山

谷之中形勢環拱頗秀蔚加達良曾屬莫盧農之部落
硼山貿易一大市鎮也人皆獵狼

俗里國疆域平曠近尼阨河常有水患厥土潤澤最宜
播種俗勤力作土番雖多爲奴然儻俐耐勞首部卽裕
厘甚寬闊植木城而裹以鐵周三十里居民蕃盛強勇
阿丹人常侵之皆被驅逐王宮儉陋國王曾殺有名游
士曰巴客大受惡名後遂優禮格臘白頓遊人以改前
過

洼瓦國蕞爾地耳而田疇膏沃地當孔道都邑居民不

及二萬而蒿司沙之商賈薈焉市陳百貨曲港連賈管
絃宵晝行人至止穀醴錯陳

磨爾俄在磨斯沙洼瓦兩部之西北半多叢山茂林幾
阿麻其首部也王奉回回教敬匪底祇神宮殿設兵扈
衛宮室帷帳陳設侈靡土番驕勇敢鬪盜賊尤多剽奪
四出

莫司沙國在裕里國之下首部落卽名莫司沙濱臨尼
阨河河岸寬闊下卽大石灘舟楫往來素稱危險地宜
五穀前爲阿丹人所據後始殺逐阿丹自立爲國前時

遊人巴客被害，即在此灘。

嚴阿國美田疇多農商西方富庶之區也。轄大部落五口。嚴阿曰磨府。曰匱那。曰幾司。曰查吉仙。原都磨府。近遷居嚴阿城。周有十五里。民戶未詳其數。磨府今雖不復爲都。而居民安之。尙稱樂土。匱那在國南。幾司在國北。若查吉仙。則山谷之中矣。王宮及民舍。牆皆苦覆。惟門楣多有雕飾。頭目見王。曲跼盡禮。王多妃妾。難以數計。宮內之事。皆媵妾司之。凡祀神亦以人爲牲。特不至阿寒氏。那和彌之多耳。國中間有小山。至高者三百丈。

天氣和暖高下皆可布種產粟米棉花尤工機織其布
與尼霏國等林木馨香蜂蝶翩遶花晨月夕致堪游衍
尼霏國在尼阨河之東岸亦富庶之區居此土者半回
回半黑人泥霏之黑人又黑人中之靈敏者奴僕皆工
織機故所織棉花他國莫及轄部落八那麻其首部也
產五穀牛馬草蓆之佳甲於通洲菰爾府部落在其北
界城池堅固貿易蕃盛部民盡回教男女無別臘牙馬
及馬尼磨兩大部落均依尼阨河之東岸因阿丹侵擾
改遷西岸巴達司在莫司沙之邊界沙俄司與臘麻相

距不遠四水環繞洲浮水面工作精巧所織棉布遍洲頭目無不購而珍之有七百軍船防守邊界伊牙部亦

臨河岸長四里多商船

以上十九國皆與西洋通市

以下附五部落均自爲酋長

嘉公那部僅有大村鄉三自立頭目雖不屬泥露

國而土番頗馴

封那部距嘉公那四十里一大市鎮也再行四十里尚有數部落情形莫詳

磨卦部亦在嘉公那之下相距約八十里大市鎮

也商賈鱗萃有頭目經理其事

機里部在磨卦之下相距約五十里多商船亦一大市鎮然土瘠歉收其草牲畜不食故居民皆漁蕉菓河以糊口產油最著

伊磨部在機里之下相距約七十里城池寬大濱河口亦市埠也出口貨物油與人口居多往來船舶陳設器具頗似歐羅巴夾岸多大宅栽種芭蕉椰子聰慧麗勝於鄰國惟俗習驕汰無度酗酒

以上中阿未里加腹地諸部也尙有尼阨河上流
各國地土肥美略同遊人巴客道死不及回國莫
詳其所經歷而各大部落亦略有聞附載于後
丁麻杜國在中阿未里加洲邊界產黃金光色射目歐
羅巴人常冒險至其地部落遼闊情形莫悉方其盛日
萬司沙各國均屬統轄近數百年并已國反屬於摩羅
果矣近日黑人爲王宮室民舍半皆圓銳形若蜂房厥
壤燥瘠產不敷食仰給鄰國由尼阨河沿流運至加墨
臘津口一日可至以金礦甚旺故商旅若鶩多摩羅果

阿爾尼阿都尼司三都之人百貨充牣惟黃金奴僕兩種交易最大

麻西那國在彌尼湖之旁宜牧畜距丁麻杜部落頗遠土番付臘司種類會長卽展里會之弟

展里國濱臨尼阨河邊首部卽名展里會長阿丹人居民萬口貿易稍遜丁麻杜而丁麻杜所需貨物多購諸此商賈皆富臘司曼領俄莫馬臘摩羅四種間有黑番至此貿易

莽馬臘國土曠而沃色俄其首部也尼阨河居中宮室

民舍依傍兩岸，草牆鱗比，街衢方軌。居民三萬，南山所產金沙，皆運此出售。珊瑚山領部落，貿易亦盛。居民萬口，麻那母部落產鹽，北界曠野，爲摩羅人牧場。

加阿達國，皆沙土首部落曰甘猛。

加孫國，地小而沃，首部落曰孤尼阿加里。

沙達盧根戈盧領尼古墨魯古富臘盧五小國，高阜多林木，河中產金沙，甘干部落其大市鎮也。每遇禮拜三墟期焉。母里地多金，運此銷售。產蜜糖、棉花、火器、火藥、花布及歐羅巴貨物，無一不備。以上六部五小部皆尼阨河上游之國，未與

西洋
通市

重輯

萬國地理全圖集曰亞非利加中地北係沙漠稱曰撒哈拉北極出自十五度至三十度偏西十五度至東三十度長九千里闊三千里其沙地風吹堆積爲山炎熱難行但沙漠中亦間有水草沃壤其民大半田亞拉伯國而來以劫掠爲生其駝若舟動止醒睡恒與人同伴行路如患渴死則殺其駝飲血且胃內有存水解渴由麥西國至四十日路皆無人之地至窄谷始有樹木而

後抵非散國都，居民七萬，向麥西南形勢，距二千有百里，乃他弗茅地，其兵最耐辛苦。望南而往，則地補士亞勒兩族，貧窮好鬪，沙漠外各地皆有水草，居民愈多，大半黑面，其中有數國半從回教，恆執已見，若見白面之人，則酷待之，風俗澆漓放僻，男逸女勞，凡耕田治舍，貿易工作，無一非女，故愈娶妻女，則愈富足，土君娶婦必盈于此內尼額，大河兩岸沃饒，林樹暢茂。自古及今，內地與外國無往來之理，是以居民野心，近日英人用心周遊其地，以考其來歴，但不服水土，或染瘴或被

賊或志未成就近日又用火輪船進其內河搜訪其風俗而水手死亡船空往反竟無成功惜哉

地里備考曰尼吉里西國又名蘇丹在亞非里加州之中北極出地六度起至二十三度止經線自東七度起至三十一度止東至盧比亞暨亞比西尼二國西連塞內岡比國南接幾內國暨岳山北界沙漠長約六千里寬約四千二百五十里地面積方二百四十五萬里烟戶約二京餘口人黑色地形卑闊湖河與沙漠相間河之長者曰尼日爾曰哥拉曰要曰沙利湖之大者曰沙

德曰的別曰非德勒瀕河田多鹽腴土產稻黍麻葛
烟穀果象牙金砂皮革等地極炎熱多毒蟲惡豸外人
到輒病死故自古不通別國奉回教業農罕技藝國分
二十二部落各酋分攝不相統屬曰波爾奴曰巴耶爾
美曰北爾古曰桑加拉曰布勒曰岡干曰窩那蘇勒曰
上邦巴拉曰下邦巴拉曰馬昔那曰巴難曰的勒南曰
丁布各都曰牙烏利曰尼非曰波爾古曰牙黎巴曰北
寧曰瓜曰公曰加拉那曰達公巴

一 中央曠野此最廣之沙漠磽山不毛獨有野獸獅狼

駝鳥等其游牧亦渴饑易斃。西方之地荒風壓藤，暝暗如夜。居民罕少，野積枯骨。中一地有草木然水泉鹹商賈希利，結羣而往。族類各異，其中土亞勒地好虜掠，然客宿其家亦厚接之。若逢於野，卽便劫掠。特布族類在東方，顏色黑，惟食駝乳淡物，每遭土亞勒之虜掠，非散在地陂里之南，土豐盛長百里，闊六十六里，居民七萬，統轄於地陂里之酋。其曠野與麥西國交界，海港頗通商，其曠野有佛廟，四方禮拜雲集。此外多沙磧，無大部落矣。

利未亞洲各島

原志此洲不載島國今取泰西各書補之

職方外紀曰聖多默島在利未亞之西赤道之下闊千
里徑三百里其地濃陰多雨愈近日處雲愈重雨愈多
凡在此島之果俱無核又有意勒納島鳥獸果實甚繁
而絕無人居海舶從小西洋至大西洋者恆泊此十餘
日樵採漁獵備二三萬里之用而去又赤道南有聖老
楞佐島圍二萬餘里從十七度至二十六度半人多黑
色散處林麓無定居出琥珀象牙極廣

亞細亞以西之地地中海與利未亞洲北境相首尾有島

百千其大者一曰哥阿島、襲國人患疫有名醫名依卜舉大火燒一晝夜火息而病亦愈蓋疫爲邪氣所侵火氣猛烈能盪涤諸邪也

加得不用藥石令城內外徧常鑄一大

氣常清明終歲見日無竟日陰霾者

其海畔常鑄一大銅人高踰浮屠海

中築兩臺以盛其足風帆直過跨下其一指中可容一人直立掌托銅盤夜燃火於內以照行海者鑄十二年

而成後爲地震而崩國人運其銅以駕駛九百隻往負之

一曰際波里島豐物產每

歲國賦至百萬葡萄酒極美又出火浣布是煉石而成

地熱少雨嘗連晴三十六年土人散往他國今稍稍湊

集矣

地里備考曰本州之島分隸西洋各國管轄其隸布路

亞國者三處皆設總管一曰馬德義辣島在亞德蘭的
海西北長一百八十里寬七十里烟戶一億二萬餘口
山勢峭壁氣溫和土肥饒穀果豐稔葡萄尤盛首郡名
豐札爾○二曰布威爾德島在亞非里加州之極西緯
度自北十四度四十五分起至十七度二十分止經度
自西二十四度五十五分起至二十七度三十分止內
有十島大者名桑的可阿烟戶一萬七千餘口土產穀
菜縣椰藥材甘蔗藍靛葡萄烟葉等物地燭烈不害居
棲禽獸充斥鱗介蕃衍十島中名桑非里卑者出火島

也。三曰桑多美北林西卑島在本州西義內亞海灣中分爲二一桑多美島回環四百里地氣不駢而田腴產豐一北林西卑島長八十里寬六十里地氣溫和田土禽獸穀果均與桑多美島相等。

隸天方國者五一幾羅阿島在東方幅員十數里土產寥寥四面險阻船隻難度一蒙非亞島長三百三十里寬四十里田土腴腴物產豐盛一桑西巴爾島長二百五十里寬五十里泊所穩便貿易興隆一奔巴島幅員三百五十里地多肥饒土產木料本島爲天方管轄

者三分之一一索哥德拉島長二百五十里寬一百里泊所穩便地碗少泉貿易無幾土產象膽朱砂禽獸等物

隸土耳其國者曰馬蘇阿在亞比西尼國馬蘇阿海島之中烟戶稀疎泊所穩闊商賈雲集地氣焰烈

隸佛蘭西國者曰聖盧義斯島田土膏腴貿易興隆地氣不和一哥勒亞島泊所穩便凡佛蘭西船往亞細亞者必至其處一烏阿羅島賊多民散四望空虛以上各處皆在塞內嗣比亞國中一布爾濱島在印度海長二

百八十里寬一百三十里烟戶約八萬五千口土腴腴氣溫和內有火山土產黑金珊瑚穀果桂皮鱗花烟葉
材木香料泊所不穩有總管駐訓

外國史略曰亞非利加各洲島其東方最廣大者曰馬他牙士里島廣袤方圓一萬零五百里長二千二百里闊約四百五十里及七百里南極出十二度及二十六度偏東四十四及五十二度其居民約四百萬口族類不一形狀甚美此島蕃毓出五穀百果蠶絲香料黛青牛畜銅銀鉛中央皆大山密林有土酋管之惟阿瓦族

最大近名曾歸於一主嘉慶間部主聰明召外國藝術
賢士教化土民道光十五年女王攝權仇視耶蘇門徒
半死殺戮此地向通商佛國每欲開埠多染癆斃近女
王與英佛兩國肇畔○補吞島並所屬之洲三百二十
里南極出自二十度五十分至二十一度二十分馬島
東向之嶼一帶皆山判分此島峰高千丈無平坦地多
百餉丁香等物居民十萬黑七白三大半耕田此島荀
苟亞所開後佛蘭西據之產貨甚多恨無灣泊之港○
離此嶼不遠之茅勒士島在補島東面南極二十二度

二十一度中間廣袤七百餘里地面二萬七千三百二十四頃此島豐盛白鯪最多凡南洋之物皆有之地有火山草木叢叢荷蘭人曾至此後佛蘭西據之遂荒蕪白面人其裔也喜慶年間讓與英國黑面人五萬三千道光十六年運進之物值銀二百七十萬兩船三百四十九隻所運進者二百五十萬兩英國調兵帥管之黑面人無用每僱唐人治其田道光十六年收稅餉七十一萬所費四十一萬七千兩○西識羣島天氣和美洲有五產白鰩椰子等民少而食用足港口無暴風捕鯨